

130.119
42
=10

10253

成安縣志

卷十四上

金石

金石文字曰象近於圖曰誌曰記近於史曰箴曰銘曰頌近於經曰表曰題曰書曰款識近於子集故金石一種除陶鑄性情標揚功德外足以補圖與經史子集之缺而相爲表裏非徒辨蝌蚪篆隸分楷行草之文供考古者摩挲摹翫已也區區黑子如成者所存金石能有幾何況又經歷年兵匪焚掠風霜蝕剝殘缺毀滅自隱於荆棘灰燼中而莫由採訪者哉雖然不可廢也謹就今之所見與昔之所聞者旁徵曲引而載於書勿令與漠漠潭沙永沈沒而不出也則又幸也志金石

洪鐘

洪鐘在城東南隅舊懸儒學櫺星門內金大定十七年太平興

國禪院鑄舊縣志

鐘今在文廟東轅門外下馬碑右鈕高二尺勾交四龍身高八尺餘圍丈六有奇上鑄字體係周篆惟代遠年湮風霜剝蝕字迹模糊不克辨識一憾事耳

銅像

銅像在縣黨部院內廚房東土房中南向金身丈二依然巍巍綠銹斑斑雅然可觀惟下身缺損年久無考

圓照寺鐵佛

成安縣志

卷十四上 金石

一一

天津文竹齋印

圓照寺舊有銅佛一鐵佛二均坐像舊志露紋民國四年就寺興學將佛像拏送城南匡教寺

大士居鐵像

大士居在城西北隅圓照寺南破屋三楹北向中有大士三鐵像

石獅

石獅在儒學前門左右元泰定三年二月辛未日彭城趙氏置

滏源石匠史通造舊縣志

獅現踞高初級小學校之體育場門左右左依然如故右失去年久無考

霍宏泰造石浮圖銘

心經石刻 唐相州成安縣霍宏泰造石浮圖銘並心經正書

太極元年二月在城西郎堡圓銘寺

金石分
域編

圓銘寺在城西十二里郎堡村唐太極元年壬子二月十三日

建有古柏石浮圖俱千年遺蹟

縣志

按查圓銘寺舊址在北郎堡寨東門外一片瓦礫土邱隆起古柏無存石浮圖依然矗立於荒煙蔓草中高約五六尺石刻字迹至今猶存其銘序有云欲使都人士女見靈刹而虔恭闕闕簪纓觀靈臺而景仰庶使昆蛟蠢動俱離三塗法界有情咸歸八正其銘有悠悠六趣擾擾四生等句尙可辨識

成安縣志

卷十四上

金石

三

天津文竹齋印

餘皆剝蝕不成字形然字體蒼老筆畫古硬洵爲近代不可多得

城東北二十里北鄉義村有漢大儒二戴碑代遠年湮風霜剝蝕字迹模糊莫可辨識惟中間一行云漢大儒大小戴故里碑村人爲之建坊以資保護云

簿尉劉公去思碑

元楊威

聖人稱善政民畏之善教民愛之班馬之史傳循吏不傳能吏善教者孔子意謂循吏也善政者能吏也能與循皆吏也一得愛稱一得畏稱循之與能優劣分矣成安簿尉劉公有惠愛有才幹此之謂循全德之人歟公姓劉氏名仁字寬夫順德府平鄉縣人氏充刑公勾當官中書省闈其有廉名勾授左三部勾當官至元四年聖旨黜冗員而部符留公依擬勾當考滿授磁州成安縣簿尉蒞事三年任滿將赴選民戀戀不已投狀保舉留挽而不能得也僉曰吾縣不治久矣自公爲治屬官大和事不苟且民無橫役胥無貪暴前令孔公後令韓公公每議事溫

成安縣志

卷十四上 金石

四

元州文竹齋印

言悅色是則喜從之而役少有差則方便折准至于差役之分數系銀之多寡貧富之高下花戶由帖並無冒濫雖權在縣令而公之贊成者多矣自到任至任滿所增收交參避役者百餘戶亦助成令之一端也部河倉稅他縣到倉至有半月不得納者惟公與倉官較是非分曲直以溫顏辨折使斗斛半收受速無欺誑無橫費到便納軍民省濟此才幹之一端也行軍馬團結營寨之者權豪勢要之家羊馬牛畜損失田禾齒嚙桑棗公依國典施行所償者無怨言此不畏權豪之一端也自到任來晉盜逃秦有雖鼠竊隨緝隨獲此有權變之一端也部符催車戶造納祥襖令委公監督他縣則就聚一處捶督嗔喝晝夜不

得散公則不然約與期限使各遂便造納他縣未半而公所管者工已畢矣此誠著于人之一端也聖旨以蝗旱貧民食不足以倉餘糧借給貧民公與倉吏約曰此皆聖主恩民公等共承上意成一段好事廼驗實貧困者甲乙其名監視斗斛分毫無私貧困得濟此恤貧愛民之一端也本縣軍戶王玉被賊盜殺傷牛一隻公跟隨蹤跡至屯營去處其營東鄰廣平北鄰肥鄉所盜者牛數極多他縣視營若海無敢窺伺者公直入其營賊俱獲歡衆欲齊拏之公數之曰軍非民不食民非牛不耕今國禁私家有牛者不得宰殺殺牛者重罪之汝百戶一軍縱汝軍盜民牛而又殺之使民不得耕無以供軍食汝罪當與盜牛

成安縣志

卷十四上 金石

五

天津文竹齋印

者同酋聞之大恐懼乃使左右獲賊出營致之于法此能于尉職之一端也噫嘻惠而信以愛民威而勇以補盜可謂才力兩全恩威並行及其任滿而行也不期而會送者闔縣境千有餘至于截鐙留鞭涕泣不忍別公自安撫司勾當官名聞于省舉爲省勾當官考滿除成安縣簿尉公事上以忠任公以勤蒞事以敏折獄以平馭胥以嚴愛民以惠待令以和周旋奉上勤勤敏敏罔墜國典加之以手不釋卷非公之才之惠安能使民留挽去思之若是哉成安軍民紀公投下等實政遂琢石而紀之

題其額曰去思

舊縣志

邑侯許公墮淚碑

明汝陽趙遇

許公諱汝進字升之河南歸德睢州人正德辛酉魁薦經辛未以親老祿養就除鉅鹿令是時流賊弄兵郡邑騷動公多方保障民賴以安賑使侍郎王公巡撫都御使寧公並加獎賞謂其愛民不擾類漢循良吏直指王公謂公有剗劇才遂疏改成安鉅鹿民攀轅不及有從之寄闐闐閒者既下車兵火方熄水旱相仍十室九空饑殍在道公加意撫綏書天理陰鷲四字于座右口口行之其自奉也衣敝而後更求食則粗糲不厭其口口也供給行廚事從減省出門趨從不過數人其口口口躬先化導絃歌講藝肇授禮經如張潤身口口以口口者實多其救荒也開廩賑之煮粥贍之全活無算流徙皆歸如張憲等相繼復

成安縣志

卷十四上

金石

六

天津文竹齋印

業者幾及百家其息訟也兩造具陳剖決無滯匪直面從且有革心向化之效其彌盜也有犯必獲有獲必罪羣盜聞聲遠避民間不外戶不閉之風其勸農也躬巡阡陌游惰者禁荒蕪者罪勤苦者褒獎其善開墾者徐責其科其編審也賦則有章程吏書無假借凡可裨民悉從其便自是鄰封疑獄多願質成旁邑差徭籍憑簡閱太行之左漳水之陽環千里內百姓呼曰神君長吏取爲型範當路方擬大用公爲海內造福乃直指錢公忌未郊迎遂註下考大計時遽罷吏議公從容哂曰昔孔子不得衛卿則曰有命孟子不遇魯侯則曰天也吾受人之中傷非天命耶于人乎何尤遂作自笑歌浩然而去一時士夫及民間

老幼遮道號呼公亦下馬各相視流涕久之方行皆曰許公得
鉅鹿民心去後碑之吾儕沐公濺澤寧愜然乎昔襄陽人爲羊
祐碑崑山名曰墮淚我公仁政何遜羊祐旣挽留不得盍亦仿
佛襄人之爲乎因乞余言紀其實政鐫石儀門之左題其額曰
墮淚碑君子之至于斯者得觀覽焉庶知襄陽之風于斥邱再
見也故記之

舊縣志

邑侯桂公去思碑

邑人張潤身

成安當趙魏之衝風勁俗淳其人多質直尙義苟非深得其心
而但塗其耳目能使愛而信之以至悠久而思慕不忘難矣桂
公以嘉靖改元夏來牧茲土越明年擢南京刑部主政濱行之

成安縣志

卷十四上

金石

七

天津文竹齋印

日鄉民老幼莫不奔走悲號如失慈母留其烏肖其像未已也
復請余文而刻之珉以志厥思公何以得此于成之民如是其
速哉蓋斯民也三代之所以直道而行也好是懿德懷于有仁
誠有不知其然而然者以今而追論公之人品超卓學術精醇
其爲政務從寬間而不規規于法律其爲教必以孝弟忠信禮
義廉耻爲先故治不期年而庶務咸修百姓安堵六曹惟坐嘯
焉隣邑質成者無慮數百里一剖咸服當道諸公數以古學古
行有守有爲考上上彭繡衣入境迎而謂之曰美哉子之政也
據含淚之言見召杜之恩情據逼民之論見晉陽之保障據流
民復業千數百口要行分處使有固志見周人勞來還定安集

之古意天下有私皆若此彼持利斧斬長橋以慰斯民之望者當且束之高閣上矣噫公之賢能如此宜吾民之目觸時艱心釋德澤而不能已于思也如造冊之役抗輿馬折乾之索今也朕乎孰不思昔之樽節其財也策禦大盜罷民壯上府之操今也朕乎孰不思昔之愛養其力也荒而賑之疫而療之今也朕乎孰不思昔之周恤其生也賦役偏重思其均之者豪強肆志思其鋤之者馬數復增催科復擾刁風復作思其汰之息之者繫獄經旬則思囹圄之空虛怨女曠夫則思室家之完聚多門出政思不若獨斷之爲公脫穎驕人思不若斂華之可尙數者皆民之所弗能忘也或曰以公之賢良而子所稱者數事將數

成安縣志

卷十四上 金石

八

天津文竹齋印

事之外尙有未善者乎余曰不朕高厚不可繪而細微易以描溟渤不可探而沼沚易以測公之善固未可言也余特就民口碑所同載者書之耳其詳在諭俗編社學圖政事記諸書可考也公名萼字子實登進仕第別號見山安仁世家也先爲丹徒武康令今其三世云

舊縣志

邑侯王公去思碑

太平朱子光

蓋聞令以親民爲職能親民者民亦親之以德樹風化行俗美若影之隨表響之應聲詩曰豈弟君子民之父母非謂此乎若九難王公近之矣公名鈴浙江黃岩人以制科出宰百里歷宜興將樂二縣俱有善政在人耳目迨起復補成安甫下車卽勤

民間俗政尙寬和嘗曰養民在豐財豐財在節用故其馭民也
一操之以節勞然民便公指畫亦無不諭誠以應者時里役在
官類以支應爲名箕歛下戶公洞其弊盡裁之斯民自此免無
名之徵矣縣非通衢而使者每務取捷往來亦多絡繹公曰邯
鄲置有郵傳成安已輸金協濟而取捷者猶舍彼趨此民力何
以兩支遂申明監司阻絕其路小民迺有息肩之期矣觀學舍
之傾圮也大加營繕俾師生之藏修游息得有所資洪鐘久廢
也建樓懸虛而聲教四達士民悉愉快焉潘氏節婦也則旌其
里陶盤孝子也則造其廬民之相視以勸者彬彬乎仁讓之俗
矣越明年遷留都工曹郎啟行之日里巷扶老携幼攀轅臥轍
成安縣志

者得有所考乎

舊縣志

命惟謹及去之日顧若罔聞有如今之戀戀弗舍者乎可見民
心至愚而神君子豈第則父母之非誣也既別之明年李鴻臚
棲鸞吳太學桡樊茂才景龍耆民張楫等懷公明德不能忘不
遠千餘里祈余言用志去思余以疇昔其事悉公治蹟且頌揚
徽猷又衷所樂輸也乃述其行事使歸而碑焉庶後之議從祀

重修廟學記

靈寶賀賁

成安儒學自創建以及修葺各有碑記貴養士重勞民也狀規制簡陋成化丙辰郡守秦公民悅縣令張公雲韓君溫拓而新之巍狀稱壯麗矣國子監丞林公大猷嘗紀其事嗣是而補塞者寥寥焉弗論也戊辰冬予自留臺徒守茲郡時崑源王君以甲榜進仕爲邑令首崇教學政理維新邑人懽然愛戴越明年夏潦水大作郡中咸苦墊溺而邑學壞甚講習無所君愀狀以修葺爲任遂捐俸金若干兩米麥若干石以倡僚衆主簿學官及鄉士夫義民各輸有差總四百餘金財用旣裕乃鳩工募役督修則主簿王瑤而會計出納一錢無爽則封君蔡也自文廟

成安縣志

卷十四上

金石

十

天津文竹齋印

兩廡櫺星等門以及明倫堂齋廊號舍皆擴陋以宏易朽以堅葺欵以正飭以丹采煥然奪目計三月而告成俎豆崇嚴絃誦聿起且財出于勸輸費而不傷役取于招募勞而不怨于是王君齎狀請余記余謂典學育材守令責也邑有賢令守可籍以寡過余固于王君愛莫助之朕不能無言爲多士勗以廣作新之意夫邑趙地也古所謂慷慨悲歌節義激烈者今非其俗耶國家教養二百餘年乃茲邑以文獻稱英賢輩出科第相望官遊者皆赫赫有聲故抗疏犯顏者忠也立身揚名者孝也秉憲觀風者節也宣猷禦侮者義也是皆風土之所產而教養之所成其勲業位望將有名當世而軼古先者在多士亦可以觀感

而興矣否則文藝以陋其習溫飽以卑其志豈作新者所望于
二三子哉噫闕宮修而泮水頌言游宰而武城歌文翁守而蜀
郡興古靈令而仙居化吾固知多士之必有成也謂非王君有
大造于茲邑可乎異日觀士風以徵宦績則叨守茲郡者亦可
借以寡過否耶因刊之序舍以爲多士勗王君名琢玉字文修
崑源其別號也山東莘縣人登羅萬化榜進士政績循良未易
指數修學其大端云蔡封君名紹先薦明經任長葛令以子可
教可賢貴封戶部郎中倡義勸勞邑之陳太丘也宜併識之餘
悉載于碑陰

舊縣志

改建學宮記

會稽陶望

成安縣志

卷十四上 金石

十一

天津文竹齋印

成安踵勝國舊爲學宮堂宇宏壯稱畿內而尊卑密疏之制或
弗中倫成化迄隆慶繕除之役間舉未備仍訛因陋未嘗曠狀
大易其故積歲弗治塗墍漶滅棖題覆撓敗垣半立惟幕筵几
壘洗登豆之屬弊壞逋亡咸弗中度廩延劉君令茲邑修謁庭
廡下循覽歎息思剗革簡謬用嚴秩祀崇政教之原本爰謀博
士生徒暨鄉先生僉曰幸甚雖狀公財殫無以贍事明府仁恕
縱舍金矢靡輸因改大役義不以獨煩公家請分植具貲于是
蔡參知可賢任東廡蔡明府可行任啟聖祠國子生吳君維寧
進士吳君維東任鄉賢祠餘乃屬令令捐金穀鳩工力以先之
阡士響應萬曆三十年春二月告役于廟明年孟冬乃落成先

是啟聖祠在廟門東南隅不稱尊親推報之義而名宦鄉賢二祠列于門屏猥褻尤甚僉議更徙文廟後故有訓導宅於是改祠啟聖遷名宦鄉賢祠於戟門左右序而以故啟聖祠祠文昌名義順成灌獻以序故東西廡各十四楹楹損其三而度書藏器更衣點齋之所咸備焉鬻鬻新覩什器完好諸生安從善又以私財市銅鑄壘豆簠簋爲屬四百十有六于是衿佩之士瞻厥廟貌樂其成功之易也謁文以記之予惟成安吉昔乾候地夫子作春秋詳其事于齊晉齊晉者諸侯之長聖人所欲托以行道者也竊怪當時車轍所適衛齊鄭宋陳蔡荆楚之郊屢矣晉大而邇魯未嘗一至蓋臨河而返洋洋乎有餘思焉豈其國

成安縣志

卷十四上 金石

十一

天津文竹齋印

大俗龐上權譎師武臣未可告語耶狀仲尼既沒子夏居西河其人尊事之疑於夫子而子貢之徒段干木田子方嘗以其道爲諸侯師流風藉甚道術光顯未有盛於茲者則嚴師重道彬彬願化之美宜莫二晉若狀後知聖人之教蓋久而彌信也乾侯晉邑魯寓公居焉意其時習魯人聞魯事聖人神化之道稔於耳目宜必有聞而興起尤異於他邑者而今特不可考耳去聖人之居若斯之近徒以霸國餘俗習尙譌謬間嘗竊聞餘風而無以一辱其車轍雖或得之於沒世而失之於當身土壤之所役屬疆域之所附麗宜亦有幸不幸焉明興而成安列於畿輔地官卿敬敷之典大司樂咸韶之教朝布夕施蓋孔子之道

大明於昭代而成安與於首善士生於茲其亦甚幸也哉當嘉靖初前令桂文襄公以言禮親幸驟都顯要方是時正封號定禮樂嚴所以崇事先師之制悉洗前陋歸于至當文襄宜有助焉狀區區一鄉之校願有未遑而以需諸來者將時各有在與遠者施于四方憲於百世近之一邑而皆足以明因革之數崇殺之等有功於學官成安之多賢令也信矣哉劉君諱永脉字衍傳河南延津縣人教諭黃君河濤訓導秦君琛易君像皆協謀相力宜並書於石

舊縣志

重修鄉賢祠名記

邑人袁魁

成安在畿輔之南寔乾侯故墟迄今殆幾千百年所輿稽從祀成安縣志

卷十四上

金石

十二

天津文竹齋印

學宮諸賢僅十五人焉噫難哉祠舊在儒學儀門外非制也邑侯廩延劉公乃謀之吳太學維寧進士維東移置戟門之右恢廓宏麗近聖居儼朕咫尺矣復采石以鐫名焉顧不偉與余於是而窺風之義矣善居者按圖式善御者循故轍以古法自宜遵也而賢之風世也殆猶是乎賢故不同自文學奮跡得君致顯樹名世不朽之業斯其最著者也若以俊傑自負動遵古昔輒挺拔儔伍者次之間有韋布水樸能植一節一義遠邇頌慕者又次之是皆得與祀典者也豈無義耶蓋鄉賢關一邑之文獻而籍以模範乎後生修美報核故實也它日諸士子目擊而指轉相評確某也賢而古某也賢而今某也顯某也微九原如

可作也吾誰與從編氓顧而咨歎曰大夫不皆文士也何獨賢我猶未免爲鄉人也得無耻乎後裔仰而徘徊曰茲吾先人所以取重鄉評也吾不能嗣修令德得無貽先人辱乎自是後裔名賢者出不特表見里中褒狀樹績於朝字或異邦必推所自曰茲鄉某賢裔乎慕德向風風且遠也又安可以一鄉限也或曰祠國制也由來久矣前此不風之乎人情久則玩玩則弛弛則風斯頹矣茲一新之正以新人耳目也耳目新心志胥從而新道化融洽治隆俗美不亦大我文獻之鄉耶記曰吾親于鄉而知王道之易易也信夫斯風義也知風之自匪侯之烈乎又匪觀風君子所宜采擇而不遺者乎遂勒諸石而爲之記

舊縣志

成安縣志

卷十四上

金石

十四

天津文竹齋印

重立知縣題名記

延津劉永脉

余自束髮受書卽知嚮往古循良吏每聞縣令行一惠政輒擊節稱羨行一苛政則振腕增嗟蓋民之一利一害一休一戚關於令最殷而令之一顰一笑一言一動通于民甚易故民尊令爲父母令視民若赤子顧名思義其夙夜兢兢不知當何如策勵此詎可嘗試漫爲傳舍其官而秦越其民哉成令之有題名蓋自嘉靖乙未前令謝公始迄今寥寥六七十年其姓氏里第顯晦升沈未盡臚列且字畫剝落難垂不朽及令不一搜羅登載將益至湮沒不可考何以昭淑慝而示勸懲也政暇因進諸父老子弟廣詞博訪曰前此成令之爲鸞爲鳳與如鷹如鷂者

幾茹檠飲冰與封殖營私者幾執玉捧盈與蕩節踰閑者幾夙
典夜寐與棲遲偃仰者幾釐弊剔蠹修廢舉墜與踵常襲故玩
日愒歲者幾於是邑人色動或爲之首疾或頌不容口或無毀
亦無譽或淒其涕數行下因而請入祠春秋俎豆者余廼喟狀
歎曰名何容易哉夫民斯民邑斯邑寄斯寄政效之淺深得失
于人心者乃至大較若斯是可見澤長而名長仰瞻而愛敬生
此不朽之名仁則榮也澤短而名亦長瞻而愛敬不生此不朽
不仁則不榮也華袞斧鉞豈不宵壞懸哉朕而芳規覆轍頌人
所自趨何如耳仲尼曰三人行必有我師余于斯重有感焉由
是翻狀而企凜狀而慎于凡興利除害同休共戚重顰笑而慎
成安縣志

卷十四上 金石

十五

天津文竹齋印

言動以求克勝父母之任者何可不爲之深思也遂援筆勒之
貞珉以垂民牧永鑒

舊縣志

改建帝廟記

蔡可教

是歲我敝邑劉令君蒞任之三年也政通人和四郊寧謐蓋令
君勤恤民隱而興除其利害故事治民安其成功有如此者于
斯時也迺蒐邑乘中郡神應祀者協士論順民情修葺其祠宇
焉帝一祠又令君首崇而深念者也時有士人唐子若彝及壽
官韓遇春咸樂於經紀其事規制湫隘者恢拓之基社頽圯者
增築之周垣污堊者丹碧之撤舊更新屹朕具瞻一邑且材不
期于速集役不違乎農時而工迺造成矣于時令君爲之色喜

因介唐子問記于不佞不佞誼不得辭竊惟帝之爲神也主鎮北方故北方人多祀之所從來長遠矣予嘗問之長老諸人僉曰形家言我敝邑城趾中心隆狀四隅汗下用是產茲土者多負氣耻下人以故爲士者鮮有大樹立爲農及商賈者無所蓄貯一遇潦旱爲災富者拮据終歲僅能餬口貧者轉徙溝壑日不聊生此人事之不修耶抑亦神之弗佑耶吾儕小人不能窺測子大夫爲我解之予應之曰所謂 帝者聖不可知而體物不遺者也故易曰聖人以神道設教而天下服先王垂訓俾人以禮事神俾神以正直聰明爲人造福神與人蓋交相助者也且令君爲天子命吏號曰神君勤民敬神固所有事民之頑者成安縣志

卷十四上

金石

十六

天津文竹齋印

教所不化刑所不悛狀一語及神惶狀驚悸若無所逃遁焉者是故神則監臨下土以虧盈益謙人則滌濯此心以悔過遷善卽令君與民亦且上下相安風俗漸歸仁厚豈非人神之交如五味相濟有助于教刑之所不及者乎長老皆曰聞子大夫之言昭狀若發蒙矣第令君初意欲築帝宮之址高與城齊且令形勢恢廓增爲儀門及左右翼室俾中土隆狀者猶俯焉在下庶與形家者言相符合狀尋以泮宮費多而止豈非我令君爲吾儕節省而有待于異日之作爲也乎哉狀據今日之落成業已巍狀煥狀足爲安神之府矣今將爲麗牲之石斬子一言以識歲月何如予曰狀遂記之

舊縣志

重立成安君祠記

劉永脉

成安君祠不知創自何許時歷世因之士人歲時致祀蓋以成安古趙地君爲趙將而此實其封爵云君之由封不可詳嘗披史遷列傳君始與張耳爲布衣交常受笞耳與樹下數語而悟其規模識趨卓狀宏遠矣迨與淮陰對壘井陘廢左車計輒自稱義兵不用詐謀竟以殞身儒者頗爲惜之方暴秦毒虐天下是時謀臣武士亦第塗戮生靈以邀成功又趙李良弑其君諸侯環視而不討臣民反面而事仇向微君倡義討之趙不顧亡哉後卽以膠柱害成廼其好生之仁尊主之義終有不可泯滅者况淮陰出奇猶爲高帝所忌原非匹也惡得以成敗論英雄哉趙地古稱慷慨悲歌之俗曩時豪俠如武靈平原望諸藺相如諸君子今人每一念至輒有扼腕興慕者况生君之爵邑聞君之梗概有不懷仰者乎則其立廟奉祀永永無斁也固其所矣祠舊坐預備倉後成化十三年前令何君讓秦郡守秦公檄殫力重新之有江陰吳公啟記石在馬嘉靖二十年萬令

成安縣志

卷十四上 金石

十七

天津文竹齋印

文彩復移置圓照寺東前爲門屏中爲正祠後爲羣房蓋加壯麗迄今垂六十餘年正祠曾經補葺尙堪奉祀羣房已堙沒無存門屏浸成敗壁至斷碑偃伏草萊中半生苔蘚更殘缺不可讀矣卽宜及時鼎新緣改建文廟暨帝城隍諸神祠財力俱誦工未易就姑爲新飭門垣重縣扁額復礪石付劊劂氏勒此

數語俟懷古君子得有所考而增飭焉是則余追崇前哲意也

創立僧會司記

劉永脉

明興重儒術以襄治道他如佛氏之教亦併存使不廢以故郡設綱會司分給印記擇其謹厚者令署其事與參闔屬蓋其定制也余叨令成安願懷補偏救敝志凡陰陽醫學業已相地興建至圓照寺亦稍加修葺有僧名勝根者曉宗旨善書法素爲衆所推舉會册立尊恩遂援例授以冠裳裨掌記焉獨其司尙未有也詢及父老迺知初創寺時卽于後殿東南隅除官地一區有房三楹迨嘉靖乙卯僧真梅等募緣將原房高啟殿宇而成安縣志

卷十四上

金石

十八

天津文竹齋印

經籍貯焉西增對室五楹設門于中南北各建翼室三楹號曰經堂萬曆丙子鄉民張文卿捐金二百餘兩之鑄造接引銅佛一尊高丈二有奇安置藏經殿偉麗莊嚴輝煌耀目至甲午歲會正張世光樊秀齡等復釀金錢將經堂翼室重新之而以僧道箱董其役故規制雖仍舊貫而輪奐視昔有加余謂經堂旣坐官地營成又出衆力卽公所也况復無礙于藏經乎故外扁曰僧會司內扁曰禪林秉鐸因進勝根示以立司之由復諭以掌司之義自是司教有人覺衆有地不爲諸僧得所依而約束且其一縣之中而寺宇羅列印司互具俾與陰陽道會並無遺缺于曩日補偏救敝之意亦庶幾其大備矣因豎石記之用識

歲月若司字年深漸就傾圯則有後之賢牧長在

舊縣志

儒學教諭晉州韓先生去思碑

邑人吳維東

今之博士率皤皤黃髮視芹官猶菟裘也爲之弟子員者亦齎
疣視之于其去也醵金一盞挈盞一饒袂纒分而姓名已茫狀
矣獨吾邑韓博士之去諸弟子員若有不能爲情之甚者于是
伐石爲碑徵余文以志厥思余曰余固覺韓先生之異亦何感
之神也僉曰諸生事先生年餘不知其異也第覺莊生所稱虛
往實歸怒適而廢返者于先生有焉先生去諸生數月諸生眞
恤焉若有忘也若無與樂是泮水也是何人者也子大夫其定
先生之品垂之不朽以慰諸生之懸懸余曰先生儒者姑無他

成安縣志

卷十四上

金石

十九

天津文竹齋印

稱而不聞孟氏之論柳下乎不辭小官必以其道遺佚不怨狀
後可以寬鄙敦薄爲百世師今先生望儼卽溫資深取逢居狀
大受之噐而浮沉氾鐸可謂辭小官乎意所不可臨以上官之
勢不能奪不可謂不以道也年餘博士輒擯王門誰爲此禍人
知其寃先生曰命也其如命何怨耶非耶余至鄙薄每對先生
便有水流雲在之意覺天地之大而出門之無有礙也祖先生
于西郊見與某氏之子由由握別無異乎昔又未嘗不笑怒龜
之爲淺矣誓與先生共守此以直之訓也先生眞無愧于柳下
乎諸友旣親炙之惡能已于去思哉嗟乎人情之僞至今已極
何武之思不俟夫弛肩之日羊祜之淚偏墮于炙手之時去思

一事遂成笑柄余雖不敏向嘗羞撰其文獨于韓先生則惟恐其文不自己出也先生諱守護字撫之號純齋

舊縣志

邑侯馬公去思碑

邯鄲郭佳鎮

成安去我邯鄲五十里阡陌相連煙雲相合邑侯德政無不悉知天啟癸亥之夏成侯馬轉北地郡丞成之士民願借寇焉勢不能留越明年甲子思之愈甚相卒以圖永其思者樹碑縣門外爲士民常目在之于是妻弟李莘係成庠諸生因徵余記之按侯名珍號聘吾爲代人自柱史公下四受天寵書未消香者二百年餘侯登萬歷己酉鄉榜以學行聞光明磊磊文采炳如比知成安耻爲俗吏真心實意一本諸大公至正之行成有書

成安縣志

卷十四上 金石

二十一

天津文竹齋印

院而無舉行侯新之拔邑庠弟子之季而考課焉酉戌兩榜需次聯飛者五侯之振作人文士風不變邑中無處不聞陟唔聲至如輕徭薄賦緩征便民市井草莽有同愛慕漳爲成害已久癸亥夏汜濫入城侯親率夫役日夜修理護堤庶乎城不爲沼民免魚鼈日用止取蔬菜不以奢侈攘民衙役不輕差遣恐以需索害民而行戶不損一本之撫約斤斤不敢外尺寸且夫役馬匹之屬斯民苦之侯不忍濫用且請之當道而加增其廩洵仁者哉其他種種善政卽連篇累牘終難爲罄當道多所量重以才優經濟器之嗚呼成邑多名牧如寇忠愍桂文襄千百年下民德之赫如前日侯出其後規模豐采足繼其美侯在成邑

三載有餘今去一年所矣民指書院閱讀書聲者必重曰新侯之民當徭賦之入必重曰侯緩之胡以得此于民如是哉民不難使之畏惟得其愛者爲難蓋愛者思之所出也思出于愛愛根于仁侯其仁者歟民何思之深也余嘗以文贈侯知侯之悉是以前爲民之志其思

舊縣志

重修關帝廟記

陳廷謨

帝之廟滿天下匪獨成安也卽成安之修帝廟亦時見于境內又匪獨東關也彼關人士縱竭土木金碧之費終何酬神聖涓埃乃僉謀而勒諸石不似過乎非也朕其中亦自有說聞居關者云昔年辛未秋七月突有流寇數百人怒馬控弦直薄城下

成安縣志

卷十四上

金石

二十一

天津文竹齋印

維時城門堅閉關民骨血坐胞宛吻未幾乃嚙指南遁嗣有人自掠回者備述其嘖嘖當日臨城惟事遙見一偉丈夫赤頰長鬚綠袍大刀挺立東門外勢莫敢犯遂擁衆去關民以是德之故興茲役客曰信耶誕耶廷謨悚聽未竟起而喟狀曰信也非誕也天地間皆理也理之所在皆氣也試俯仰日月山河種種法象誰非元氣充周所以運行不息變化日新奇奇恠恠總歸于平平常常是故苟爲氣之所有便不爲理之所無况人秉天地之全賦元氣之粹帝又萃其全而援其粹者乎嘗遐想炎焰將熄綱常殆盡此乾坤何等時也帝久伏猷畝中麟編三絕涵養閎深作用愈大知治統匪異人任慨然有撥亂反正之思繼

往開來之意潛聞昭烈足以有爲且屬漢正系遂傾心刎頸以
兄弟之交敦君臣之義偶舉其指日喻心秉燭明志諸大義大
節俱詣極聖域其生也固至大至剛之氣也其死也亦常剛常
大之氣也到于今方將合日月山川光明流峙而神功聖德顯
庇此一關民致使關民亟亟鳴報正如日精月萃山青水綠偶
爲發蒙者觀臨輒不禁驚奇叱恠而不知此法象之生成綿亘
古今布濩宇宙亦甚平矣常矣雖狀六合一隅之推千古一時
之積安見一關不足以見六合一時關民之心不足以見千古
不死之心也此又理之可信者耳

舊縣志

清貢生錫九逸公墓表

公諱範字錫九姓逸氏成安人也祖諱綉父諱宗佃自鄉賢公諱韜以來世爲邑之望族公性恬靜淡於榮利爲學務實踐治家嚴戶庭內外必整潔事親孝先意承志孺慕終身親歿哀毀葬如禮四方觀者多取則化於鄉幼穎異稍長知刻苦溽暑祁寒讀不輟弱冠補諸生因親老棄舉業操家政位不副德時論惜之葬親後絕意仕進以琴書松菊自娛慕陶靖節之爲人精鑒藏所收書畫甲畿南賞鑒家多推許持身謹嚴足不履市居第距縣署僅數武一生不通干謁尤爲人所難能公生於嘉慶戊寅十二月六日辰時卒於光緒辛巳九月十七日酉時春秋六十有四元配任繼配趙又繼錢繼劉繼李趙劉尤識大體守遺業理諸務一以公爲法當時稱賢淑焉子一女一女適徐村李氏子良峯李氏出受業於余有父風蓋公之貽謀遠故流澤長也丁巳正月欲立石表墓以彰懿德求文於余余重違其請爰就所聞知者縷述之著於石俾景仰芳徽徵文考義者得悉公之素行或亦表幽闡微之一助云

民國五年

本邑歲貢耿介之撰文

廣平舉人楊蔭溍書丹

王公祝三先生墓表

清例封奉政大夫晉封中憲大夫王公諱嵩壽字祝三先生邑

庠廩生也原隸山西洪洞縣籍由明洪武年間始祖榮字錦還
遷居是邑王彭留村二世祖瑾歲進士歷任山東淄川直隸密
雲兩邑知縣三世祖馴例授修職郎四世祖琦歲進士任河南
尉氏縣教諭至十五世祖養魁字超衆邑庠武生祖毓華字秀
生邑庠生本生祖文華字燦章邑庠生父泰然字安舒本生父
浩然字配義邑庠生先生仰承前烈思振家聲其所讀書處顏
曰願學齋爲諸生時屢冠文場無奈時數限人秋闈卒不得志
然立身制行實有大過人者年未弱冠卽以孝弟仁讓聞於鄉
其事父母也先意承志終身不衰遇本生父母喪葬大事舉凡
飾棺修墓祭祀豎碑等費悉與本門長兄各出其半仍如未嘗
出繼者此事求之晚近不少概見先生兄字長發雖各立門戶
自成家業然兄友弟恭情誼極懇摯公立生意一所名其堂曰
同心蓋取伯仲同心和氣致祥之義也每日聚首晨夕怡怡數
十年如一日先生堂叔雨田公捐館時遺子鳳儀方四歲先生
憫其孤無依六七歲時卽招至家中令與己子同業儒口爲講
指爲畫歷久不倦俟其成立而後已又先生堂姪如盤字安于
如璋字岱宗皆從先生讀先生循循善誘不遺餘力後皆先後
入邑庠先生族叔澄清公仗義疎財待人常過於厚以致晚年
家中落幾至無以謀生先生惻然傷之因與兄長發公公同商
酌計日齎糧更迭以養其老逮棄養後凡衣衾棺槨以及一切

送終儀節無不格外從優且先生揮霍好義醫術尤精見有顛連無告者無論識與不識皆竭力周濟又購京通省衛各樣丸散自製七釐散九分散鐵扇散生肌拔毒散諸藥雖遠方人昏夜求之無不立時給與卽費錢甚多不恤也由是每年全活幾至不可勝數又見義勇爲勞瘁不辭歷辦本縣公益各事必以實惠及民爲先務直隸布政使任公道鎔知之有素佩服良深特送匾額一方題曰惠周井里鄉人感恩者衆本擬生前送匾以誌景仰之誠先生極力阻之事遂中止先生仙逝後鄉人感戴不已重伸前說先生哲嗣煥章與弟懷沂不忍再拒闔鄉遂公製一匾謹書德孚桑梓以紀其實是豈諸公之阿其所好蓋

成安縣志

卷十四上

金石

二十五

天津文竹齋印

德澤入人之深故沒世仍不能忘也夫德成者名立實大者聲宏公以孝弟仁讓見稱於世就其生平所爲歷歷考之無不確有可據然後知先生之得名非偶然也矧先生幼年家業中衰艱苦萬狀幾有不克自存之勢乃深明大義不讓古人自奉雖極儉樸而敦宗睦族與夫救困扶危之事無論如何爲難必竭力經營不留餘地其至性至情誠有超出尋常萬萬者嗚呼以先生之德器才華卓犖當代使得際會風雲必將利澤及天下乃遭時不偶生平學業謹見於一鄉一邑間未免所施不廣而有利器徒抱之憾雖然達而在上恩及當世窮而在下道寄此身求古之今聖賢中懷經濟而不遇如先生者正復不少可勝

歎哉公娶周氏同邑文生啟蒙公孫女國子監太學生正甫公女文生俊儒公胞妹例封宜人晉封恭人懿範徽音足爲女式子四人長邑庠增生如金字式之過繼胞伯肇基公爲嗣次未名童年早逝次廩貢生如綸字煥章孝友性成學問淵博次廩貢生如曾五品頂戴字懷沂諸孫六人一名翰卿邑庠生直隸法政專門畢業會執行律師職務一名翰文邑庠生法政專門校外畢業過繼堂伯式之公爲嗣一名翰彬法政專門校外畢業一名翰元河北大學法學士北平訓政學院經徵班畢業曾任山西注音字母委員平漢路第一火車貨捐局局長一名先舟北平民國大學法學士中央政治工作人員養成所畢業會

成安縣志

卷十四上 金石

二十六

天津文館印

任安徽運漕權運局代理局長漢口特別市政府財政局及社會局科員江蘇邳縣中學訓育主任等職山東考取縣長一名務盡北平民國大學法學士中央陸軍軍官學校軍官研究班畢業曾任國民革命軍第十軍第三十師政治訓練部少校組織科科長兼宣傳科科長河南省黨部幹事等職語云積善之家必有餘慶明德之後必有達人今觀先生後裔子孫振振世濟其美英才濟濟遙駿有聲天之報施善人固不爽也然而正未有艾也介與先生鄉相距僅數里每有疑義常就正以求解先生輒窮源竟委析縷分條剖別惟恐不盡約計一歲之中承教不下五六次又與煥章同硯席與懷沂訂交遊此往彼來朝

夕共話故於先生素行知之最居多數今者援筆記載惟舉先生嘉言懿行昭昭在人耳目者就其事而直書之使孝弟仁讓之風垂諸久遠百世之下聞者莫不嚮慕則有裨於世道人心者誠非淺鮮也先生生于道光十年正月二十日卒于光緒十三年十二月二十二日

民國五年世晚耿介之撰并書

清勅封承德郎警心李公墓

余牧歸州之初年成安王君喆堂介余堂叔少潛父通書招余曰吾鄉李先生富而好施厚德君子也今沒二十年鄉之人過其墓者未嘗不欷歔下涕也吾鄉故瘠土貧乏者多居之自先

成安縣志

卷十四上 金石

二十七 天津文竹齋印

生出而鄉之貧民衣者衣焉食者食焉未嘗失所也婚者婚焉葬者葬焉未嘗廢禮也耕者耕焉耨者耨焉未嘗曠業也咸豐七年歲饑先生出資賑之人千錢全活甚衆而餒者忘其餒焉同治二年寇警蠶于鄉人集資起寨不足先生出數千緡助之寨賴以成而危者忘其危焉寇之至也四方避亂者老弱男婦襍鄉人嗷嗷寨中先生或周之粟或食之粥而困者忘其困焉先生行善垂四十年貸於人者以鉅萬計償者力不給則塗其券歸之或揉其券焚之而負者並忘其貧焉先生之德如是鄉之人弗敢諛謀爲文以曝於世子盍代爲之余自有知識每見一二耆老鄉閭善行必先縷指先生先曾王母趙太夫人及仲

王父刑部府君之喪先生兩赴吊余家見先生恂恂焉貌溫而語和同時會葬者先後皆千人咸耳目屬先生識先生者道先生之善津津然若身受其德其不識者聞先生之名又悵悵焉恨不與同閭里也先生冢子婦爲余堂姑幼字也長于歸寧余家縫紉餘暇輒爲余道先生軼事光緒甲午余以庶常改縣令明年之官湖北道出於先生旁里次於逆旅門臨市往來者湊焉主人指謂余曰彼棟宇巍然者善人李先生家富而好施鄉之比其賴者不可勝數也道旁一人進曰主人之言信某伯某仲先生所助之室家也今兒女成行矣某壘某邱先生所恤之棺衾也今墓木拱把矣一人應聲前曰君言非他人某某吾比

隘也逆旅主人復言曰叟曰是也因指其寨垣曰余曰是莪莪者疇昔之歲而不成吾之鄉老弱男女暴骨原野者不知凡幾矣今得安居樂業聚族於斯者孰不先生賴也衆譁聲曰信然哉信然哉以余平昔所聞質之王君來書其言若符節之合遂叙列之郵致於家復介余堂叔歸之王君俾謀諸其鄉人勸諸石而標之先生之阡先生諱銘字警心勅授承德郎國學生生於道光十一年卒於光緒十六年春秋六十有一妻韓氏張氏皆有賢行能補成先生之義舉其先生后母系具公子振淵等自爲記中故不着

永年武延緒撰

採訪冊

成安縣志

卷十四上

金石

二十九

天津文竹齋印

清敕封承德郎國學生李公諱銘字警心安人韓太君張太君之墓

嘗聞曹娥因親而捐軀木蘭爲親而從軍此皆女流節孝著於當時芳名流於後世者竊念及此未嘗不景仰於無窮也相自離裏以來我父母劬勞之恩勿待言矣卽旣嫁之後日累月贈不憚馳驅之煩夏葛冬裘絕無毫末之吝且也置良田營華屋器具飲食難以枚舉惟望家門昌盛後嗣繁衍使妾享棄揄之福以誇耀於一時誠能若斯應不負我二人之心哉孰知門衰祚薄妾夫壯年不幸早世孤子嬰孩相繼而歿旣無兒女之歡又無子媳之奉零丁孤苦形影相吊每一念及黯然神傷古人

云死生有命富貴在天信然信然猶幸二弟勤儉治家有道群姪俊秀才學可卜財田似陶朱粟紅貫朽子孫猶汾陽男聰女秀千金之積螽斯之慶振振繩繩雖曰人事豈非我父母積德行善多端有以培養於其先者哉卽椎牛祭墓不如雞黍之逮親存而刻石成文亦足發妾之苦衷而已雲山蒼蒼白水泱泱父母之德山高水長臨邑王匯川撰採訪冊清邑庠武生化南李公墓表

公諱振湘字化南姓李氏李徐村人也生而孝友雖在少年性近老成讀書十餘年知大義轉而習武一試入邑庠方期時習騎射再獲雋於鄉會試不幸家君謝世主政無人遂棄舉子業

成安縣志

卷十四上 金石

三十

天津文竹齋印

而以克家爲務自來生長素封耽安逸尙浮華一旦自專不知若何侈靡公乃恂恂自守衣則黜華崇樸食則寧儉勿奢膏肝勞形無稍懈年逾不惑恒產倍見增益居家尙嚴肅子姪輩一戾其前靡不惕惕瘖畏與外人交則內介而外和以故宗族鄉黨莫不愛之敬之生平講公德樂施與因修府志捐貲郡太守吳賜急公好義區額因施莊地充公本邑明府高賜贊襄公益區額元配武孺人清刑部主事道光庚子進士永年酌堂公女素嫻姆訓貞靜安和生子二長森奉政大夫同知銜討賊聯軍第六軍總司令部本部諮議次楹翰林院待詔彰德七屬警備司令部少校副官繼配李孺人太學生受益公女溫惠淑慎持

家有法生子四植梧果權均入校修業孫八光熹光燁光燿森
出光玕楹出光煥光煜植出光勳光燿梧出繩繩蟄蟄慶衍螽
斯振家聲增國瑞俱於是乎在享年四十有七卒於民國五年
八月初三日因祖塋無窀穸地遲至十一年十月一日始葬於
邢村東郊新塋森楹等曾從余學既葬後持狀至余室請表其
墓余雖不文義不容辭爰舉素所知者綴以言而勒諸石以誌
不忘云爾民國十三年通家弟耿介之撰文

採訪
冊

清增廣生王公式之墓表
公諱如金字式之姓王氏世居成安縣西鄉王彭留村清故廩
膳生祝三先生長男也因公胞伯銘三先生無子經戚族會議

成安縣志

卷十四上 金石

三十一 天津文竹齋印

立公爲嗣公生而穎異年稍長讀書日數千言不數載羣經歷
史俱成誦弱冠補博士弟子員仍奮志攻苦不稍輟科歲試屢
列前茅奈廩缺未開謹補增廣生厥後文筆高超饒有奇氣邑
侯名進士楊公簡齋廣文名孝廉王公憩菴均深加賞識謂取
青紫如拾芥乃時數限人秋闈竟不獲售且不幸早逝得年與
復聖顏子等惜哉公純孝性成凡事曲體親心故誦讀餘閒仍
不忘操持家務意在學業日進家業日增而後可以博堂上歡
此其心力交瘁有非外人所得知者至對於兄弟亦復怡然和
悅常與堂兄安于公昕夕聚談研究經史子集修齊治平之要
顏其齋曰同德堂蓋取互相切磋道合志同之意也其與胞弟

煥章懷沂二公尤屬親愛一衣一食未嘗自私卽公書院月課所得膏獎除市甘旨奉雙親外亦必分而爲三及兩弟稍長教之誨之娓娓不倦厥後煥章懷沂均以優等食餼且於辛卯癸己鄉試分膺鶚薦皆公之力也又念一本九族咸屬同氣公再從堂叔鳳儀公幼年失怙教導無人公授以四子六經親爲講解數年如一日又公族叔永年公家道中落餬口無資公因立生意一處延爲號中執事所有薪水特別從厚自此仰事俯畜無凍餒憂推而至於親友困苦顛連概難漠視若但分之以財所及亦恐無幾公則量其才授以事或盡力於田園或勞形於市肆務令自食其力各得謀生之路以爲久遠計卽有材能不

給必有待於調卹者亦必量力以資助更有勢等燃眉需財刻不容緩公卽囊橐無餘或且轉爲稱貸以濟其急而親友感公之義亦多如期以償不使重爲公累是則於人有益於己亦無大損所謂惠而不費者公則得之且生平愛人以德人或有過靡不極力相規聞者不察心焉惡之不覺色然怒之及事後深思始知無言不疾實無言非藥往往轉怒而爲喜非至誠感人何克至此公處邑之西偏去城市頗遠鄉人偶有疾作醫藥恒不易購而在無力之家尤形艱窘公乃配合七釐散鐵扇散生肌拔毒散等藥並於京津藥肆中擇其丸散膏丹最有效力者均預購於平時以待鄉鄰不時之需親族友朋求之固無弗與

卽素不識面昏夜來求亦必酌其需用多寡如願以償此其樂善好施直從至性中來而非沽名釣譽者比公元配薛孺人孝恭溫惠持家有法繼配宋孺人賦性淳良四德兼備撫嗣子如己出飲食寒暖隨時留意女一適永年城內邑庠生李公名寶賢男一未成丁從親族議以煥章公長男邑庠生名翰文承繼孫鴻志幼讀公生於咸豐 年 月 日 時卒於光緒年 月 日 時

民國十六年愚弟耿介之撰文

採訪冊

清貢生體仁遜公墓表

民國十三年二月初吉世講遜湘以其父狀來乞余表墓余雖

成安縣志

卷十四上

金石

三十三

天津文竹齋印

不文然締交有素重違其意爰舉夙所知者濡毫述之按狀遜君諱良峯字體仁成安城內人生性至孝年七歲喪母含殮畢見棺不甚美泣曰吾母卽用此乎伏地哀號泥首垢面久不起家人捉而給之曰姑勿爾他年歸窀穸再加以槨則優美且耐久於是啼漸息次年俾就傅師授課把卷高歌必成誦而後已每飯後不待家人促自知入校越二年又失怙哀毀絕食無異成人家祭時跪獻一如禮暮月後親友處通弔賀必須親往讀書時間不能無少缺然勤學性成正務外不敢一息荒年十八應童子試縣府皆列前茅旋入泮後復貢成均性喜靜治一室小如舟名畫法書分懸四壁並置圖於左置史於右行列整齊

極盡幽雅致掃地焚香晏然默坐幾如入世外桃源生平所著
惟布衣紈綺非所好也然樂施與親族中婚葬未舉必解囊資
助使成禮老幼孤寡糊口無資有時給以升斗使免於餒至乞
丐到門求則與之某年饑索食者倍於常時此往彼來絡繹不
絕竟令門者挹注疲於奔走乃閉外戶約十分鐘始啟共數乞
丐若干各給錢文使去戶復閉再啟亦如之一日之間啟閉不
下數十次雖曰小惠未徧貧者得此不無小補又常購修身治
家養生益壽以及懲淫記過等書分送同人其好行其德類如
此曾祖諱綉祖諱宗佃父諱範娶張氏肥鄉太學生廷良公女
繼娶黃氏本邑恩貢生金誥公女陰教久聆素知大義于歸後
成安縣志

卷十四上

金石

三十四

天津文竹齋印

襄理家政井井有條而且儉以奉已寬以待人實與公有同志
子二長名湘次名浦孫一名玉田湘出公卒於民國九年三月
二十七日享年四十有七謹就一生略述梗概俾勒諸貞珉用
以昭垂後世云

民國十八年河北考取縣長耿采章撰文

採訪冊

清例贈孺人劉母李孺人暨姪媳楊孺人再姪媳張孺人孝義
碑記

劉氏先塋向宅本村南郊後子姓蕃衍窳窳滋多再築佳城幾
無餘地與先塋接壤有地十二畝許係本族殿臣公恒產殿臣
公德配李氏長子書田娶鄭氏納裴氏次子力田娶李氏又納

李氏力田公乏嗣書田公子一諱松林清貢生以一子兼祧初娶霍氏繼娶喬氏又娶例贈孺人楊氏孫一諱景清娶例贈孺人張氏曾孫一諱鐸娶李現主家政者惟力田公造室李孺人及姪媳楊孺人再姪媳張孺人一日李孺人謂姪媳再姪媳曰昔聞姑嫜有言吾家有田十三畝與祖塋毗連將來族人葬埋無地可將此地施與合族姪媳再姪媳同聲應曰先人有言敢不從命民國九年冬族長清泉公家長清儒公邀同至戚李梅喬立德楊敬心張林李文謨及友誼郭合焦鳳山請於李孺人等言府上有地十三畝許適站塋前合族願以價購增益先塋局勢李孺人及楊孺人張孺人卽時應之曰此事先人曾有遺

成安縣志

卷十四上

金石

三十五

天洲文竹齋印

言今日族中果需此地情願施與不取值也再三強之終無受
值意清泉公得此消息遂與人言曰不忘先人言孝也甘作公
益事義也無以酬之可乎李文謨起而言曰以鄙人愚見贈以
孝義同欽匾額何如族長家長以及族中名三元名桂名煥名
存如名廷蘭又如懷義懷珍懷玉誠一炳玉泰壽等均極口贊
成曰可於是議乃定竊議巾幗中有此義舉無以誌之潛德幽
光久將湮沒於是濡毫縷述勒石紀事以期垂諸久遠云

民國二十一年邑人耿介之撰文

採訪冊



重修文廟碑記

邑之有文廟為闔境風化所關如衣服之有冠冕不可任其殘缺者也自同治乙丑歲重修後迄今甫有二十餘年因地處卑濕土性鬆城祠殿及周圍墻垣率皆多傾圮坍塌經儒學舒李牒請詳明勸捐興修紳士王慶潮等首先倡捐並分勸四鄉富紳及同城各官量力捐助共得京蚨若干縉糾工備料督率經營司事人等自備資斧不辭勞瘁凡七閱月而功成大成殿崇聖祠東西兩廡及名官祠鄉賢等祠一律修葺整齊戟門外改建恭慎齋敬一亭各三間由舊更新總期臻於妥善今而後竊願都人士相與維持不敝深簷大厦歷久常新則睹棟宇之輝煌

成安縣志

卷十四下 金石

一

天津文竹齋印

光增俎豆擷泮芹之靈秀蔚起人文何慶幸如之爰撫實而記其事至司事及捐紳姓名宜識諸碑陰以垂永久

知成安縣事黔南戚朝卿撰

成安縣聯暉書院主講高陽王蔭南書採訪冊

監工 教諭王慶潮 訓導張恂 增生侯懷清 武生郭清風
舉人王蔭南 歲貢蘇琴堂 生員韓敬 武生李正心
歲貢孫之貞 舉人高桂 廩生姜清雲 生員高奇峯

漣漪李老夫子碑序

人之有益於世者不必在權位也其不沒於後者不必在福澤也顧其所以自立何如耳成安文學李君漣漪於乙丑之夏携弟為章訪余於鄴城懇懇欵洽甚至迺弟氣宇靜恬循循爾雅

而君特磊落軒昂直氣動人皆良朋也相往還者三四年嗣余以己巳科檄一縣吏奔走三江者二十餘年遂以闊別茲以引疾歸田借館成邑書院追憶杯酒論文時已四十年矣以老羸未及追訪舊遊將解館去肄業生白觀濤請於余曰弟子初受業李漣漪先生積學士也家世業儒以善聞昆季四人師以次出繼長門孝友性學於山左周先生遊晨夕鼓勵五載登案元家道不豐教學閭里無論智愚莫不因材施誨殷殷不倦而修補之多寡有無不計焉先生數十年間所成就者二十餘人季弟弱冠而食餼幼子十五而列庠蘭玉一庭人以爲厚德之報無何弟竟短折子亦早夭鄉里歎之而先生強力自持不爲時

成安縣志

卷十四下

金石

二

天津文竹齋印

運所移今年八十有八耳目之聰明如故壺幃之慈孝藹然子婦貞操將光志乘人以爲得壽得名之徵今卒已葬善人必有後且俟其子孫門弟子親見先生立身制行所以教育後進者有如此不忍沒其生平請表其墓以志不忘余聞之不勝慨然國家興立學校士子講習詩書豈徒博科名趨仕官而炫耀於人耳目之前哉古稱三不巧有志者皆當有以自立也如所稱漣漪爲章兄弟其情性品行篤學善教如此足以風矣府縣庠序中皆不下數百人能人人如此豈不可反古哉此吾故人也其不幸之事吾痛之其享大年有清名吾快之而恨余之不能扶杖往吊其墓也此卽於此記於石以爲同學歡焉

按此碑序道光年間

邑人李鳳岐錄魏博進士衛鶴鳴書採訪冊

文林郎揀選知縣劉心齋先生墓表

例授文林郎揀選知縣綽如劉公諱其綸號心齋余之同學也

迺祖諱成家父諱彰叔父彬無子以公嗣之弱冠入學食餼卓

卓庠序間道光庚子舉於鄉益加勤學設教有年成就甚衆

邑侯尹公聞公品端學粹延至署教其子賓主相得閒則講論

詩文終未嘗有所干請繼則主講本邑聯暉書院於生童誘掖

獎勸維日孳孳是以王君夢熊獲雋則教育之善可知公天性

純孝兄友弟恭卽於人交亦溫柔敦厚故人傳播而贊美之既

有令名當享大壽孰意於同治三年三月初六日五十有九而

成安縣志

卷十四下

金石

三

天津文竹齋印

逝耶嗚呼痛哉公初娶賀氏再娶張氏皆無出卒於公前三娶

師氏生二子長灝次溶俱幼及門諸子慮公之德行久而不傳

也乞余以誌公墓余之言行何足以傳哉但念幼與公同課於

邑學黼平隆老夫子之門每一回晦接談時交相助勉拳拳不

忍別今已矣公之高風芳躅不可見矣雖余之言不足以傳公

之德行然過此以往恐無知公者故不辭而述其梗概云爾爰

爲之銘曰斥邱人傑星應少微生有自來苑曰金歸蜚聲藝苑

馳譽桂林朱霞白鶴美玉精金不惠不夷有學有守黽勉一生

持循孝友出其南門鬱鬱佳成流芳百世聞風意傾

按此墓表係邑人黃金策撰

採訪冊

舉人王夢熊書

清誥授榮祿大夫一品封職王瀛洲先生德行紀言王公瀛洲諱慶灑邑善士也其先歷署望都邢臺柏鄉靜海武清阜城元城鉅鹿等縣教諭所至以善誘聞公教子課孫俱有義方故科甲萃於一門爲畿南名宦又兼子孫蕃衍蘭桂承芳前清時曾以五世同堂賜額復奉

旨以樂善好施建坊而公以一品封職壽期頤貴盛亦已極矣故遠近羨慕而豔稱之莫不謂公之福過人也雖然傳有之禍福無門惟人所召公之福公之德之徵也公少時卽以孝稱母疾劇嘗齋戒露禱於庭疾輒已由是朔望齋戒以爲常及司諭

成安縣志

卷十四下

金石

四

天津文竹齋印

邢臺時捻酋北竄而邢適當其衝公從該郡守令籌辦防務目不交睫者數晝夜邢屬賴以保全捻匪俘虜甚衆有逃歸過邢者不問良莠輒爲村堡所戮公詳加審查全活良民無算一時口碑載道遐邇周知至今猶有傳焉者其在本邑如勸農獎士卹貧賑饑設宗塾助賓興修文閣建橋樑諸義舉雖更僕難終罔不慷慨輸捐首先提倡故桑梓托庇感德莫名微特此也公之持身樸素處世和平不以才學自負不以富貴驕人尤足令人欽佩焉富貴壽考天之所以報有德者不爽矣福豈幸邀哉甲寅夏公辭世其門生暨親友誼等憫哲人之遽萎恐善行之就湮僉擬勒諸貞珉以彰盛德因屬愚爲文以記之愚自知筆

愧如椽見同坐井雕蟲小技何足表公之德於萬一謹就素所聞知者摘陳梗概勉成此舉若鋪張揚厲則非愚之所長焉是爲記

清五品頂戴優廩生陳鈞撰文

清侯選直隸州判副貢劉灝篆額

清內閣中書舉人劉全策書丹

採訪冊

按察使銜河南開歸陳許鄭河務兵備道王公墓表公姓王氏諱夢熊字渭岑一品封典瀛洲公長子也幼穎異讀書日萬言鄉里間以神童目之稍長遊學都門受業倪中丞豹岑極見器重年十六應童子試輒冠軍補弟子員同治壬戌舉於鄉乙丑

成安縣志

卷十四下

金石

五

天津文竹齋印

年辛未皆蒙薦未售公遂不事科名以知府需次河南矣到省歷辦固始除旗禹州諸權務皆記大功適鄭工石橋決開陳所屬十餘縣蕩析離居嗷鴻徧地公派辨朱仙留養事宜施粥賑賑悉心籌募十閱月晝夜不息全活十餘萬衆升署歸德在任聽斷明決捐廉爲文正書院膏獎諸生感戴勒石以誌調署懷慶愛民勤政廉潔自持民間因爭水利屢年械鬪公據理剖斷紛爭立解先是充賑撫總局提調出力保補缺後以道員用至是過道班充善後支應局總辦嗣以江皖豫三省會剿渦陽土匪功保加二品頂戴庚子之變裕中丞壽泉派兵勤王籌餉運械倚公如左右手又因籌辦嵩武軍餉有功東撫袁奏保交部

從優議叙旋委總理營務處加一級遂請從一品封典爲榮祿
大夫暑糧儲鹽法道豫撫林以整頓通省車馬籌辦學堂巡警
改良監獄並爲百姓裁減浮派保加按察使銜豫撫吳又檄署
開歸陳許鄭河務兵備道在工率官役固隄防伏況皆平以功
交部優叙陸軍部劄委調查河南陸軍財政局會辦豫撫寶復
委總辦陸防軍械局中外倚公若柱石而公以瀛洲公年及期
頤遂棄官請終養歸焉嗚呼當晚清之際士大夫上奔競不得
志則鑽營苟且阿附權貴得志又把持權要頓生患失之心求
一疾流而勇於退有道則仕無道則卷而懷之之人舉國無一
焉公之退或亦矯當時之弊而同以卷懷之賢人耶非也善公

成安縣志

卷十四下 金石

六

天津文竹齋印

以瀛洲公老而衰雖萬乘之公相不忍一日去而就其請也其
歸也皆不期然而然從至姓中流出而不自知自公歸後不數
年而清遂亡是適逢其會非公歸時所及料也公精文學好獎
拔後進乙丑文闈丁酉文武兩闈公皆充監試官而性又至孝
母廉太夫人常患目疾公迎養至汴晚年瀛洲公有疾公聞電
卽請假旋里皆親侍湯藥衣不解帶者累月公回籍除娛親外
戚族鄉里有貧困有皆賙給之一率瀛洲公樂善好施之舊民
國八年十月二十日年七十七卒所著有中隱齋四則藏於家
子三長珊字海秋乙酉拔貢准補山東高苑縣知縣次琛字韻
笙山東州同次璟字紹平湖北知縣孫三兆義兆曾兆普曾孫

德俊德傑德偉玄孫文錦和與公同里閈幼時常從公遊知公最悉茲以公嗣紹平持狀乞表公墓故揭其榮榮大者泐之石以教萬世清舉人內閣中書歷署山西太甯靈邱河北隆平縣縣長簡任職任命鄉晚張永和謹表

按此墓碑民國二十年立採訪冊

于景福先生墓表

從來人無奇特之行不足以傳後世士少純一之德不足以挽頽風于公諱萬年字景福者誠吾鄉之碩彥一邑之巨擘也公賦性恂謹幼讀書不幸失怙累於家務遂廢學焉事母孝聞於鄉朝夕承歡寢膳不離左右遇母疾侍湯藥常數夜不交睫清

成安縣志

卷十四下

金石

七

天津文竹齋印

同治初年髮匪入寇鄉人相率竄逸公奉母避難行稍緩匪突至焚掠甚慘母見狀詈罵賊怒欲以白刃相加公挺身障母而言曰我母昏瞶語失倫次觸諸君怒如肯宥當啣結以報不然斷吾首以贖母命賊相謂曰此孝子也不宜加害遂相率去蓋其至誠動物有如此者然公素性倜儻對於家政不甚注意公元配趙太儒人貞靜幽閒助公治理家政持籌握算量入爲出由小康而至富有皆太儒人經營襄助之功教子尤有義方卽歐母陶母不是過也公有子一人印梅字冠芳少讀書早年入泮爲邑名士善繼公志每多義舉本村東南有漳河故道沙磧不毛幾同石田因聯絡村人組織森林會植楊柳數萬株村中

獲利甚鉅蒙縣長高公稟呈上憲獎給五品頂戴民國初年土匪蜂起組織保衛社被選爲分社社長擒獲巨匪鄉民得慶安堵公之孫印駿聲字紹文賦性穎敏由高小而中學而農業專門學校畢業於農林蠶桑頗有研究曾充本縣蠶桑傳習所教員嗣蒙本縣高縣長委任爲勸業所勸業員開導鄉民頗具熱心嗚呼箕裘克紹堂構有賴冠芳紹文君之克有令名亦足證景福公之貽謀孔善也公於宣統元年七月十七日逝世享壽七十有一歲冠芳恐先人遺跡湮沒不彰欲勒貞珉以垂永遠囑余撰文余自愧識淺學疏深謝不敏然以交誼所關不敢固辭因就管見所及援筆書之觀斯文者相見公之爲人公之行

成安縣志

卷十四下

金石

八

天津文竹齋印

公之德藉以不朽云

按此墓表民國年間邑人武重光撰文

採訪冊

縣長籍王二公德政碑

漢朝歌令龔詡嘗有言曰不遇盤根錯節不足以別利器此誠智勇兼優克任艱鉅之言也吾邑籍縣長所遇之時所處之地適與龔公等而其化裁通變因應咸宜殆有過之而無不及縣長印龔恩字兩南任邱人也民國乙丑初夏蒞茲土爾時南北軍興半載無寧日軍隊所至無在不遭蹂躪者環顧肥永邯磁等縣比鄰成邑而村民財物之損失不可勝數吾邑縣長維持治安獨籌良策雖地方担負似較曩時加重然與鄰邑相衡實

有此善於被之勢原其所以致此之由固由縣長默持藻鑑尤賴幕友王君相助爲理一切對待軍人皆王君爲之代表故事極形糾紛卒不難迎刃而解至宣力於外者復有張所長智遠林隊長修純果敢有爲不避艱險此二君生平所志不約而同嘗語人曰能教名在不教人在秉此心以任事尙有難盡之職乎觀其勦土匪以安良捕潰兵以清野膚功屢奏衆口交稱實爲干城腹心寄當籍公下車伊始軫念民隱痼瘼在抱對於各種訴訟異常縝密事無巨細必躬親研訊舉從前奔競請託之惡習一掃而空以故衙署肅清爲數年以來所未有丙寅春籍公因事解組幕友王君卽承其乏王君字熒堃與籍公同里閭

成安縣志

卷十四下

金石

九

天津文竹齋印

且甚相得故握篆後舉事無所變更一遵籍公約束致邑人之愛載王君仍與愛載籍君無稍異特恐年湮代遠受其賜者不可知其詳故爲勒石以記之

按此碑民國十四年邑人

耿介之撰文
王廷佐書丹

採訪冊

王維翰先生碑記

公姓王氏

諱維翰字

宗城成安沙河人也幼聰穎好學性純厚

孝友稱於鄉里稍長究心經史尙志節嘗讀春秋慕童汪錡之爲人爲文簡練有奇氣設局布陣逾於成人應童子試輒冠軍清道光二十五年入邑庠旋以科歲試高列補增廣生公兄弟四人伯維新叔維祺季維棟皆有賢聲公其仲也有田三百餘

畝家居相得甚歡俟以子姓蕃衍始折居公悉讓美田宅於兄弟自取礮田二十畝以國內亂不習舉子業教授生徒以自給本邑化兒店村肥邑韓家堡皆公設教地其教人以敦品勵行砥節立名爲宗旨一時守公之學知名當時者以十百數公憤洪楊蔓延江湖又念慮捻匪張總愚梵掠山東延及畿輔常語人曰大丈夫不能統百萬兵掃清寰宇亦當練團築堡保障一方咸豐八年捻匪勢愈熾公奉大名道聯本邑令張檄爲城東四十八村寨首用防匪亂官府倚公若長城已未幾捻匪由東竄入縣境公率鄉團極力抵禦因衆寡不敵單騎赴賊壘冀以理喻賊益橫公不爲屈遂遇害時年四十有二也嗚呼道咸間

成安縣志

卷十四下

金石

十

天津文竹齋印

當公死難時年甫十二家徒四壁力事寡母撫幼弟倍歷艱辛卒能勉學成功名繼公業次殿士甫四歲遵兄教孝弟力田善理家政女一適魏村李氏邑中名族也士彥生懷璧兄弟殿士生懷珍兄弟皆以名士世其家夫闡前賢幽德刊之貞石表儀來世者後生小子之所應爲也故不揣疏陋爲之銘曰治家以孝謀國以忠任有大小事異功同明道講學捐軀殉難烈士名儒合爲一傳論功行賞褒義建祠子子孫孫萬世續之

按此碑記係民國六年邑人張永和撰

採訪冊

清中憲大夫劉公墓表

警之先生諱振鐸姓劉氏世爲成安望族幼從父春溪公讀書

成安縣志

卷十四下 金石

十一

天津文竹齋印

京師官舍少年志美意氣偉然倪豹臣朱曼柏兩先生咸目爲國器未冠卽補博士弟子員既而春溪公歿先生絕意仕進從政門內以孝事王父意承色養務以怡其志敦敕兄若弟以道義埴篋翁和務以致其情理家政窮煩執勞惕惕孜孜務以昌其業業既起尚於自奉一以濟物利人爲亟清同治間捻匪躪擾燕豫室廬灰燼民物鑠耗繼以災荒道殣相望先生出資振救遠邇咸賴既罄竭乃至貶損衣食以濟務以盡其仁時邑侯蘇公殿華辦振務葺倉廩先生應其請紆謨籌策奔走先勞務以覃其力儲者既裕饑者以飽所全活者益衆以多邑人夙慕其內行之修至是咸走相告曰吾屬之生胥仗賴乎先生也事

上聞以州同分省補用適倪公豹臣巡撫廣東以書來招先生就之至則委辦梧州鹽務梧州故大郡鹽法蕩敝先生滌垢櫛紛事大辨治而竟以勞勩得咯血疾又染瘴氣病愈劇遂歸遶逾年卒矣邑人聞先生之歿又走相弔曰吾屬失所庇賴矣嗚呼先生可謂儒者也儒者以施濟爲大自科舉制興佔畢之士究心帖括但求僥倖一售售矣所學又不適於用動多阻格甚者嗜利醉財戾乎義而無所顧忌儒者遂益爲世詬病先生稟奇儻之才可以博顯名遭罹鞠凶棄之弗取一施其學於家繼施於鄉州睦任恤譽滿里閭復將推以及遠宏布所蓄而天不佑才小試繭絲遽戢厥翻其卒也於清光緒乙酉距其生於清道光丁未纔三十九歲耳儲者多所施不遐而壽復不永此固士大夫所爲歎憾者也又豈僅其鄉里之私悼痛已哉先生之配曰倪恭人曰李恭人李恭人生子二長金策次金襄先生之卒也二子尙幼季弟重三先生追承兄志以教以義使之有成於是先生震男領光緒壬寅科鄉薦繼畢業於高等師範爲先生博封贈其次男亦英年入庠孫博泉亦振振麟角一時之秀語曰爲善者後必昌先生可無憾于九原矣

按此墓表民國初年祈州宋蔭桐撰

左世琦碑記

成邑東南孫家莊吾師左老夫子諱世琦字寶臣號希珍身頽

而長鬚䟽而修品端學粹德邵年高一方之望也祖諱公順父

庠生諱擇中字得一兄諱世政 師其仲也幼慧年十七補博

士弟子員聲播庠序執贄來學循循善誘魯論所謂自行束修

未嘗無誨吾 師有焉天性孝友人無閒言嘗與里中老幼講

論孝慈友恭忠信敬篤敬務農居家之法仁讓遂形爲風俗卽

偶有爭端排難解紛事頓息蓋薰德而善良者久矣凡婚姻死

葬不能者靡弗調恤且己力既竭又稱貸以助鄉人皆德之娶

張孺人無出繼程胡二孺人程生克誠克誠生如連如連生長

春長太長治長湧門內雍睦行走侈談然後知天之報施善人

固不爽也既有大德當享期頤孰意於咸豐三年五月十九日

咸安縣志

卷十四下

金石

十二

天津文竹齋印

享壽七十有六無疾而終耶嗚呼痛哉迴憶師恩至今未報旣
易簣而弗親更執紼而靡及今已葬阡里之東北謹立石表於
其阡銘曰可法可傳兮吾師之德勒諸貞珉兮德將不滅德永
不滅兮世照典則

按此碑記同治年間係左之門人王慶潮立

訪採冊

車王氏節孝碑文

不遇疾風安知勁草不有歲寒誰識松栢故忠臣義士多出於
國家變亂之秋而節婦名媛每見於際遇坎坷之會從可見境
遇之難拂意之加彼蒼固非薄待其人也正所以全其志勵其
節成其千載不磨之名焉吾邑鮑家莊有車門王氏者廣平縣

南高曲王荆堂之女適車君同仁乃好義公之佳婦也幼出名門素嫻禮教過門後伉儷最篤詎意天命靡常同仁君年方二十而卒婦悲傷之餘誓以身殉時有以翁姑在堂不宜獨行已志重傷親心相勸者婦乃爽然失自此屏繁飾崇樸素日以孝翁姑操家政爲職務且念念以車氏宗嗣爲重勸翁納妾趙氏又娶繼姑田氏婦隻身經營志不稍懈惟至誠可以感神人定亦可勝天不數年內庶姑與繼姑各舉一子長同文次同朝婦撫小弱弟愛如己出好義公竟於光緒十七年與世長辭時同文同朝方八九歲婦爲延師授教不稍寬貸家政之餘躬親課課旋以國家變法停考試弟始輟讀留心家政年稍長次第授

成安縣志

卷十四下

金石

十四

天津文竹堂印

室婦謂人之應事當謀自立倚賴性成終非爾福爲之分爨三院令其各自經理而一己仍不時觀察指示遇有疑難代爲擘劃晚年性尤慈善待人寬厚鄉鄰有貧乏者輒周濟之卒以操勞過度體弱多病病劇語其弟同朝曰吾死後當以汝子漢堂繼吾嗣惟所有遺產當與次姪銀堂平分勿相爭致吾死不瞑目婦卒於民國十三年五月初三日享壽六十有一弟同朝如命辦理嗚呼婦至是有子矣婦若有知亦心慰矣然則車氏血食不絕如縷究其危而復安斷而復續者伊誰之力歟今者榴花又紅芳草重綠賢婦之死已期年矣鄉鄰等恐日久湮沒用特勒諸貞珉以誌不朽云爾爰爲之銘曰心如止水志凜冰霜

一生苦節百世流芳生無遺恨死有餘光與天地久同日月長

按此碑中華民國十四年五月

清庠生遂寶琛撰
清庠生劉慕倫書

採訪冊

李希仕先生墓表

自古有才華者不必有氣節而重氣節者或短於才華二者兼之實難然使安常處順才華易見氣節易彰雖難猶至非難也乃有身處逆境進退維谷卒能盤根錯節克振家聲馴至子孫繼繼繩繩緜世澤於勿替懸此一格求諸鬚眉中已寥寥不數覲而出自巾幗尤爲難中之難此非器識宏深有非常之才華兼有非常之氣節斷不克宏此遠謨明乎此而李公希仕偕配喬安人侷乎遠矣公諱宦成字希仕世居邑東南鄉呂彪村清

成安縣志

卷十四下

金石

十五

天津文竹齋印

道光季年因流寇蜂起遷城內西大街遂家焉公處世和平與人絕少爭執而外和內介不隨流俗爲浮沉常語親友曰違道以干譽此鄉愿德之賊也吾誓不爲此貽先人羞生平治家嚴子若姪無敢越禮者而事雙親則下氣怡色倍極孺慕之誠務得其歡心而始快公有胞兄二相處三十餘年兄友弟恭未嘗一日自高其崖岸時人稱之曰孝弟李家其氣節見重於鄉黨有如此者於戲賢哉自束髮後卽讀書日數千言不數載洪楊兵起土匪乘機肆擾畿南富戶率皆十室九空幸公防未然遷城內多方籌畫始免家破人亡之慘其才華卓犖爲何如耶奈命途多舛父母相繼見背自時厥後學業遂荒廢殆盡矣然自

命不凡見天下洶洶又慨然有班定遠投筆封侯之志積功累勞蒙上憲保舉六品銜方期大建奇勳爲吾邑生色詎料享年不永甫逾而立竟奉召於玉樓惜哉脫令天假之年其所建樹必有卓然可觀者而乃不得志而歿亦足悲矣公之配喬安人本邑庠生信成先生之女係出名門夙嫻姆教年未及笄已聲名洋溢公聞其賢卽竭力求婚而委禽焉此事之成雖曰遵父母命而寤寐求之實公之力爲最多于歸後事翁姑孝處妯娌和纏繇懇摯直從至性中流出一毫矯揉造作無有也翁姑寢疾安人左右承順湯藥必親嘗數十日無惰容姑常告人曰得婦如此亦足矣吾復何求奈吾福薄命盡何希仕公疾大漸時

成安縣志

卷十四下

金石

十六

天津文竹齋印

與安人相向悲哽旣而曰人誰不死所恨者時事多艱子女俱幼我之死不瞑目者此也汝之才足以成家教子吾知之矣然恐汝激烈性成自蹈匹婦之諒斯真輕於鴻毛矣汝能曲體吾心否安人曰前明楊椒山公家訓妾嘗聞之矣妾雖不敏安敢冒昧從事拋棄子女以獲罪先人公喜曰汝能如此吾雖死無憾公旣卒遺子女名一安人念公之遺訓未嘗一息去諸懷夙興夜寐艱苦備嘗雖屢遭兵燹日在傾覆流離中而臥薪嘗胆三十餘年弗少懈經理家政井井有條女稍長適廣邑武狀元張公蜀錦之子孝翁姑順夫主賢名赫赫婦孺皆知子諱清渠字布閭國子監太學生平居矜孤恤寡敬老憐貧之舉未易更

僕數醫學一道研究十餘年確有心得而於外科爲尤精求診視者每歲不下千餘人往往應手奏效全活無算且藥料均係施舍未嘗取人分文其濟世活人輕財好義洵足多也至今慶衍益斯人材蔚起長孫春芳字香圃品端學粹幼年入泮又能仰承父志舍藥濟人兩世積德喬梓齊芳實晚近來所罕見次孫春和字爲貴賦性慈祥宅心忠厚師範自治均已畢業三孫春溪字潤德事兄如父罔敢或違元孫五人長曰琇次曰璋皆在本縣高小畢業三曰珂四曰璠五曰環皆年幼讀書君子觀於公之後裔靡不同聲歎曰凡此英才濟濟遙駿有聲皆安人教誨有方之所致亦卽公之燕翼貽謀流澤爲孔長也周易曰

成安縣志

卷十四下

金石

十七

天津文竹齋印

積善之家必有餘慶家語曰明德之後必有達人此理信不誣也然而正未有艾也按安人功德彌茂節孝兼優實足流芳百世當時本處名儒欲爲發潛德而闡韜光均以請旌之說進安人愀然曰守貞教子婦人之職也以職分所當爲者而竟邀旌表予實恥之固辭不許其不自滿假爲何如夫守節不求人知難矣而能教子孫成名爲尤難教子孫於干戈擾攘時則更難中之難向非才華氣節兼擅其長曷克臻此哉今歲季春公之長孫來訪曾求曾作墓表將以勒諸貞珉曾不文曷敢當此重任既而思之曾與公忝屬姻親知之頗確而顯微闡幽又儒者義不容辭之事故舉其犖犖數大端以告當世而掛漏之譏余

亦有所不暇顧已

清例封奉政大夫晉封中憲大夫五品頂戴廩貢生愚姪孫婿

王如曾鞠躬撰文

採訪冊

喬安人經理家政堅苦卓絕四十餘年厥功甚偉較諸希仕公實不啻倍蓰此等情形親友皆知香圃又求據實鋪敘以免眞象不明故此篇命意布局與正格迥乎不同識者諒之

曾又識

皇清誥封榮祿大夫花翎五品銜升用知縣歷署望都等縣教

諭瀛洲王公暨德配誥封一品夫人廉太夫人墓誌銘

并序

賜進士出身資政大夫太常寺少卿弘德殿行走前四川學政內閣侍讀學士陝西陝安道司經局洗馬上書房翰林年愚姪

成安縣志

卷十四下

金石

十八

天津文竹齋印

甯河高廣恩撰文

賜進士出身奉政大夫前內閣中書翰林院庶吉士改湖北京山縣知縣調補咸寧縣署理歸州知州年姻再姪永年武延緒書丹

賜進士出身資政大夫日講起居注官前翰林院侍讀署山西提學使二品銜直隸提法使世愚姪常熟翁斌孫篆蓋

廣平郡成安縣王涓臣廉訪自大梁解組家居勤勤愛日借諸弟諸子及平孫曾虔奉嚴闡境至順禮至隆誼至篤也迺於甲寅中夏赴至封翁瀛洲先生以微疾薨於家先生諱慶潮以明經就教職歷暑望都邢臺柏鄉靜海武清阜城元城鉅鹿教諭

年幾耄期晉一品封奉旨以樂善好施建坊於里第又以五世同堂賜額於閭子姓數十人長子夢熊卽涓臣河南道歷署鹽法及開歸陳許鄭兵備道仲子夢漁山西左雲縣知縣暑懷仁榮河等縣知縣叔子夢燕花領道銜取婦皆名宗女二女皆適世族孫六人長珊山東高苑縣知縣早卒次琛山東州同知次璟湖北知縣又次璿玕璞曾孫四人元孫二人皆頭角崢嶸起先生乾侯望族累代衣纓家承素封繼之以勤約日益饒裕甦衍椒蕃寢昌溇熾先生親見七代禮樂儼儼至今日貴盛極矣里停石氏之車牀列汾陽之笏封高萬石澤被累朝可謂備人事之景福能善全於斯世者矣故畿南世祿之家莫不推先生

成安縣志

卷十四下

金石

十九

天津文竹齋印

爲首識者於斯有以探其本焉先生少以孝謹稱母疾劇嘗自齋戒露禱於庭疾輒已由是朔望齋戒以爲常配廉太夫人入門卽善事尊嫜助孝養致雍睦以慰先生心厥後先生恤貧族設宗學築邑城建文閣修杠梁廣鄉塾振饑黎平糶值賓寒峻興樹蓄凡諸善舉太夫人靡不贊之以言而飲之以資裝飾儉之餘尤不可及者先生司諭邢臺時捻酋北竄而邢適當其衝先生籌防禦具從守令日夜登陴激勵士卒佗未遑也然匪自孟津覃懷以來賚從者多良賤逃歸過邢誤爲郵堡所戮甚夥太夫人訪而悉之言於先生察其爲民也卽給以護符資斧送還鄉太夫人與釵璫以濟其費完活無算益以見先生與太夫

人之德爲畿輔冠足以集嘉蔭而享榮名矣是以家室如此其富厚而康寧也子孫如此其騰達而蕃昌也一身如此其聰明而壽也是足爲天下後世勸已先生卒於甲寅孟夏九日午時溯生於道光丁亥仲夏四日春秋八十有八太夫人先於光緒癸巳季秋二十二日卒距生於道光壬午季夏二十六日春秋七十有二將於甲寅年十月初八日合厝於大姚堡之阡渭臣寄狀於其同年甯河高贖恩乞爲銘銘曰

漳河之隈隋皇之臺雲木菴秀蔚爲奇村斯文木鐸鬢序宏開八踐講席桃李親栽載誕豪俊庭列三槐汴都豸繡光暎上台踵仕齊晉鳧鳥裴徊乾端坤倪大化胚胎慨沂懿德歲轉星回成安縣志

卷十四下

金石

二十

天津文竹齋印

蓉城斯啟佳氣崔嵬七十而墓悲墳老萊秋生蘭桂泣灑瓊瑰四方觀仰千載榮哀敬銘貞石用告雲來

採訪冊

清貢生樂天張公墓表

公姓張氏

諱

琴書

字

樂天成安善士也世居西區裴裏村幼性

好善初讀四子書在止于至善句撫經歎曰善之一字不特明德在是親民在是而道亦在是矣第視吾能致之焉否也能止焉否也讀未幾爲文亦冷然善年十八補博士弟子員旋食廩祿邑侯及儒學皆嘉公善而有恒月課列前茅常以公領袖善類焉光緒三十四年貢入成均正值矢志上進之際父厚精公逝世公以家務所累不得不以善天下國家者退而善諸家公

早失恃事繼母以孝聞待異母弟極誠懇且其治家本於身以
身之善善善相因推之家使一家皆善惟爲家本寒素家之所
需常窘阨不能支公將幼時所積私產盡數出而維持逾年猶
不足公並營坂餼之業以農家副產佐之家業始稍稍振公一
面理家政一面勸人爲善輯錄文昌帝君陰騭文關聖帝君眞
經朱夫子治家格言太微先君功過格王用予行宮記袁了凡
立命篇諸善書蒐羅羣注間亦附以己意匯爲一部名醒世眞
言發梓印送前後共一千八百部城西南一帶置此劇亂之時
多有善人出而支柱皆公化導之力也公晚年尤輕財好施非
慈善事不作民國初僑寓永年價購丁某女爲使女後其父欲
成安縣志

卷十四下

金石

二十一

天津文竹齋印

爲公道也公卒年七十一德配楊孺人子三延芳延齡延緒孫

八

天祥 天相 天助 天慶
天申 天和 天佑 天順

皆能以善世其家公卒之次年親友溫

鶴姿等慮公之善言善行久而湮沒釀金立石以表公墓囑之於和和以知公之深義不容辭故亟述之以教萬世清內閣中書歷署山西大寧靈邱河北隆平等縣縣長簡任職任命世愚姪張永和謹表

採訪冊

清邑庠生奠安葉公墓表

奠安葉先生

諱

維清成安東漳河村人也其父和煦君生二子

先生其次子也生而厚重寡言稍長卽勵志讀書既入邑庠以

硯田爲業循循善誘後進賴以成全者甚多每遇和煦君壽辰

成安縣志

卷十四下

金石

二十一

天津文竹齋印

拜祝者濟濟盈庭大半皆門牆桃李觀其師弟之間相感如此其道德高尚殆真不愧爲一時端人正士已先生之祖父嘗得婦人產難秘方捐籌款項施藥活人至先生已歷三世仍藥施無稍倦怠時兼習外科與內科均確有心得殆合秦越人華元化而爲一不僅高出時醫等輩也其先世保存古方不過僅施藥而已至先生則藥藥並施遠近賴以全活者無算清光緒二十六年歲大饑貧民聚衆均糧富室皆無以自保時先生爲東路團長鎮撫有方隣村倚以爲安蓋其平時待人極有恩惠貧民均感化其德而不忍爲無意識之蠢動也暮年課子孫尤嚴並以醫術傳孫棟享年八十三歲蓋棺之日雖婦孺皆咨嗟而

太息非德盛禮恭感人素深者何以能此子一名培之下植基
邑庠生孫六長桐四楹皆治家務次榮從軍江蘇三棟乃以醫
道世其業五棨六棋均幼讀觀於先生之子孫蕃昌而知積德
累仁由來以久殆非一朝一夕之故也先生生卒年月日與葬
所事畧不具故例不得書爰爲之銘曰
宋范文正曾著訓詞不爲良相必爲良醫醫相雖異同爲濟時
矯矯先生大名昭垂潛心儒術抗顏經師岐黃業著和緩名馳
箕裘相衍施藥不辭既享遐齡復秀孫枝其存其歿婦孺皆知
異口同聲莫不含悲感德難忘報以豐碑

二次傳令嘉獎五等寶光嘉禾章

成安縣志

卷十四下

金石

二十三

天津文竹齋印

直魯豫巡閱使署軍法官署理成安縣知事高廷璋撰文採訪冊
于仲仁先生墓表

易曰積善之家必有餘慶書曰作善降之百祥如于公仲仁可
以當之矣公少時讀書數年雖姿才聰敏但不喜帖括遂以捐
資列入國子監太學生嗣因家不中資經營商務未幾一鄉稱
素封焉然公之秉性深純局量豁達自奉雖儉約與人一本於
眞誠其濟人之急也則排難解紛其任事之勇也則急公好義
其濟人之窮也則救災恤鄰諸多善舉罄竹難書後世雖少傳
聞當世孰不欽佩五桂聯芳嬌美竇家良有以也公長子桐少
入邑庠次子楷相桂俱入武庠五子檳體材魁梧膂力過人讀

書未卒遂延師習武府縣試俱列前茅惜未經院試而科舉之制適停不然前途曷可限量然慷慨好義亦卓有父風焉公之持身處世如此洵不愧一鄉之善士第羨公之田產豐盈子孫蕃衍流澤孔長而不知公之積德累仁者非一日矣公卒於清光緒十九年十一月十六日享壽七十有四越禦民國六年親友等撫今追昔悼哲人之既萎恐善行之就淹僉願勒諸貞珉以彰盛德因囑余爲文以記之余自慚筆墨荒疏澁滯不堪何足表揚公德於萬一姑竭雕蟲小技勉襄盛舉以圖塞責云爾

按此墓表民國六年邑人陳鈞撰文

採訪冊

成安縣志

卷十四下

金石

二十四

天津文竹齋印



